

謝
康
樂
集

謝康樂集卷之三

樂府

善哉行

陽谷躍升虞淵引落景曜東隅晼晚西薄三春
燠敷九秋蕭索涼來溫謝寒往暑却居德斯頤
積善嬉謔陰灌陽叢凋華墮萼歡去易慘悲至
難鑠激涕當歌對酒當酌鄙哉愚人戚戚懷瘼
善哉達士滔滔處樂

隴西行

昔在老子至理成篇柱小傾大綆短絕泉鳥之
栖遊林檀是閑韶樂牢膳豈伊攸便胡爲乖枉
從表方圓耿耿僚志慊慊丘園善謌以詠言理
成篇

相逢行

樂府作惠連今
從藝文作靈運

行行卽長道道長息班草邂逅賞心人與我傾
懷抱夷世信難值憂來傷人平生不可保
陽華與春渥陰柯長秋槁心慨榮去速情苦憂
來早日華難久居憂來傷人諄諄亦至老

親黨近卹庇昵君不常好九族悲素霰三良怨
黃鳥邇朱白卽頽憂來傷人近縞潔必造

水潦理就濕火炎同歸燥賞契少能諧斷金斷

可寶千計莫適從

當有憂來傷人四字

萬端信紛繞

巢林宜擇木結爰使心曉心曉形迹略略邇誰
能了相逢旣若舊憂來傷人片言代紵縞

悲哉行二首

萋萋春草生王孫遊有情差池鷺始飛天裊桃

一作柳

始榮灼灼桃悅色飛飛鷺弄聲檐上雲結

陰澗下風吹清幽樹雖改觀終始在初生松蒿
歡蔓延樛葛欣蘩榮眇然遊宦子悟言時未并
臯感改朔氣眼一作心傷變節榮佗僚豈徒然澶
一作緬湯絕音形風來不可託鳥去豈爲聽

羈人感淑節緣感欲回次我行詎幾時華實驟
舒結覩實情有悲瞻萃意無悅覽物懷同志如
何復乖別翩翩翔禽羅關關鳴鳥列翔禽常儔
偶所嘆獨乖絕

長歌行

倏燦夕星流，昱奕朝露團。粲粲烏有停，泫泫豈
暫安。徂齡速飛電，頽節驚驚湍。覽物起悲緒，頽
已識憂端。朽頹改鮮色，悴容變柔顏。變改苟催
促，容色烏盤桓。亶亶衰期迫，靡靡壯志闌。旣慙
臧孫慨，復愧楊子歎。寸陰果有逝，尺素竟無觀。
幸賒道念戚，且取長歌懽。

君子有所思行

總駕越鍾陵，還顧望京畿。躑躅周名都，遊目勸
忘歸。市鄽無阨一作夾室，世族有高闈。密親耀華

苑軒夢飾通達孰是金張樂諒由燕趙詩長夜
恣酣飲窮年弄音徽盛往速露墜衰來疾風飛
餘生不歡娛何以竟暮歸寂寥曲肱子瓢飲療
朝飢所秉自天性貧富豈相譏

會唵行

六引緩清唱三調佇繁音列筵皆靜寂咸共聆
會唵會唵自有初請從文命敷敷績壺冀始刊
木至江汜列宿炳天文負海橫地理連峯競千
仞背流各百里漉池漑粳稻輕雲暖松杞兩京

愧佳麗三都豈能似層臺指中天高墉積崇雉
飛燕躍廣途鷁旆戲清沚肆呈窈窕容路曜嬈
娟子自來彌世代賢達不可紀句踐善廢興越
叟識行止范蠡出江湖梅福入城市東方就旅
逸梁鴻去桑梓牽綴書土風辭殫意未已

折楊柳行二首

鬱鬱河邊柳青青野田艸舍我故鄉客將適萬
里道妻妾牽衣袂拭淚沾懷抱還拊幼童子顧
托兄與嫂辭訣未及終嚴駕一何早負笻引文

舟飢渴常不飽誰令爾貧賤咨嗟何所道

騷屑出穴風揮霍見日雪颼颼無久搖皦皦幾
時潔未覺泮春冰已復謝秋節空對尺素遷獨
視寸陰滅否桑未易繫泰茅難重拔桑茅迭生
運語默寄前哲

緩歌行

飛客結靈友凌空萃丹丘習習穠風起采采彤
雲浮娥皇發湘浦宵明出河洲宛宛連螭轡裔

裔振龍輶

文苑
作旋

日出東南隅行

柏梁冠南山桂宮耀北泉晨風拂檐幌朝日照
閨軒美人臥屏席懷蘭秀瑤璠皎潔蘊松氣泚
德春景暄

苦寒行

初學又載四句樵蘇無風飲鑿冰
煮朝餐悲矣采薇唱苦哉有餘酸

歲歲曾冰合

合作食

紛紛霰雪落浮陽滅清暉寒

禽叫悲壑飢爨煙不興渴吸水枯涸

豫章行

短生旅長世恒覺白日歆覽鏡睨頽容華顏豈

久期苟無迴戈術坐觀落崦嵫

燕歌行

孟冬初寒節氣成悲風入閨霜依庭秋蟬噪柳
驚棲楹念君行役怨邊城君何崎嶇久徂征豈
無膏沐感鸛鳴對君不樂淚沾纓闢牕開幌弄
秦箏調絃促柱多哀聲遙夜明月鑒帷屏誰知
河漢淺且清展轉思服悲明星

上畱田行

薄遊出彼東道上畱田薄遊出彼東道上畱田

循聽一何轟轟上留田澄川一何皎皎上留田

悠哉過矣征夫上留田悠哉過矣征夫上留田

兩服上阪電

電一作雷

遊上留田舫舟下遊颺驅上

留田此別既久無適上留田此別既久無適上

留田寸心繫在萬里上留田尺素遵此千夕上

留田秋冬迭相去就上留田秋冬迭相去就上

留田素雪紛紛鶴委上留田清風颺颺入袖上

留田歲云暮矣增憂上留田歲云暮矣增憂上

留田誠知運來詎抑上留田熟視年往莫留上

留田

鞠歌行

德不孤兮必有鄰唱和之契冥相因譬如虬虎
今來風雲亦如形聲影響陳心懽賞兮歲易淪
隱玉藏彩疇識真叔牙顯夷吾親郢旣歿匠寢
斤覽古籍信伊人永言知己感良辰

順東西門行

出西門眺雲間揮斤抉木墜虞泉信道人鑒徂
川思樂暫捨擔不旋閔九九傷牛山宿心載違

徒昔言競落運務頽年招命儕好相追牽酌芳
醕奏繁絃惜寸陰情固然

泰山吟

岱宗秀維嶽崔嵬刺雲天岵嶸旣嶮巖觸石輒
千眠登封瘞崇壇降禪藏肅然石閭何晻藹
堂祕靈篇

雜詩

述祖德二首

序曰大元中王父龕定淮南

負荷世業專主隆人逮賢相
祖謝君子道消拂衣蕃岳考卜東
山事同樂生之時志期范蠡之舉

達人覺自我高情屬天雲兼挹濟物性而不纓
垢氛段生蕃魏國展季救魯人弦高犒晉師仲
連卻秦軍臨組乍不緹對珪寔肯分惠物辭所
賞勵志故絕人苕苕歷千載遙遙播清塵清塵
竟誰嗣明哲垂經綸委講綴道論改服廉世屯
屯難旣云康尊主隆斯民

中原管輅亂輅亂豈解已崩騰永嘉末逼迫太
元始河外無反正江介有蹠圯萬邦咸震懾橫
流賴君子拯溺由道情龕暴資神理秦趙欣來

蘇燕魏遲文軌賢相謝世運遠圖因事止高揖
七州外拂衣五湖裏隨山疏濬潭傍巖藝枌梓
遺情捨塵物貞觀丘壑美

九日從宋公戲馬臺集送孔令

季秋邊朔苦旅鴈違霜雪淒淒陽卉腓皎皎寒
潭滌良辰感聖心雲旗興暮節鳴葭戾朱宮蘭
卮獻時哲餞宴光有孚和樂隆所缺在宥天下
理吹萬羣方悅歸客逐海隅脫冠謝朝列弭棹
薄枉渚拍景待樂闕河流有急瀾浮驂無緩轍

豈伊川途念宿心愧將別彼美丘園道喟焉傷
薄劣

鄰里相送至方山

祗役出皇邑指期憩甌越解纜及流潮懷舊不
能發析析就衰林皦皦明秋月含情易爲盈遇
物難可歇積痾謝生慮寡欲罕所闕資此永幽
棲豈伊年歲別各勉日新志音塵慰寂蔑

從游京口北固應詔

玉璽戒誠信黃屋示崇高事爲名教用道以神

理超昔聞汾水游今見塵外鑣鳴笳發春渚稅
鑾登山樹張組眊倒景列筵矚歸潮遠巖映蘭
薄白日麗江臯原隰萋綠柳墟囿散紅桃李心
美陽澤萬象咸允昭顧已枉維繫撫志慙塲苗
工拙各所宜終以反林巢曾是縈舊想覽物奏
長謠

晚出西射堂

步出西城門遙望城西岑連障疊巘嶸青翠杳
浚沈曉霜楓葉丹夕曛嵐氣陰節往感不淺感

來念已深羈雌戀舊侶迷鳥懷故林含情尙勞
夢如何離賞心撫鏡華緇鬢攬帶緩促衿安排
徒空言幽獨賴鳴琴

登池上樓

潜虬媚幽姿飛鴻響遠音薄霄媿雲浮棲川作
淵沈進德智所拙退畊力不任徇祿反窮海臥
病對空林衾枕昧節候褰開暫窺臨傾耳聆波
瀾舉目眺嶇嶔初景華緒風新陽改故陰池塘
生春草園林變鳴禽祁祁傷幽歌萋萋感楚吟

索居易永久，離羣難處心。
持操豈獨古，無悶徵在今。

遊南亭

時竟夕澄霽，雲歸日西馳。
密林含餘清，遠峰隱半規。
久痾昏墊苦，旅館眺郊歧。
澤蘭漸被沍，芙蓉始發池。
未厭青春好，已觀朱明移。
慊慊感物歎，星星白髮垂。
藥餌情所止，衰疾忽在斯。
逝將候秋水，息景偃舊崖。
我志誰與亮，賞心惟良知。

遊赤石進帆海

晉夏猶清和芳草亦未歇水宿淹晨暮陰霞屢
興沒周覽勸羸孺况乃凌窮髮川后時安流天
吳靜不發揚帆采石華挂席拾海月溟漲無端
倪虛舟有超越仲連輕齊組子牟眷魏闕矜名
道不足適已物可忽請附任公言終然謝天伐
石壁精舍還湖中作

昏旦變氣候山水含清暉清暉能娛人游子憺
憺一作澹忘歸出谷日尚早入舟陽已微林壑斂暝
色雲霞收夕霏芰荷迭映蔚蒲稗相因依披拂

趨南逕愉悅偃東扉慮澹物自輕意愜理無違
寄言攝生客試用此道推

登石門最高頂

晨策尋絕壁夕息在山棲疏峯枕高館對額臨
迴溪長林羅戶穴積石擁階基連巖覺路塞密
竹使徑迷來人忘新術去子惑故蹊活活夕流
駛噉噉夜猿啼沈冥豈別理守道自不攜心契
九秋榦目翫三春萋居常以待終處順故安排
惜無同懷客共登青雲梯

於南山往北山經湖中瞻眺

朝旦發陽岨景落憩陰峯舍舟眺迴渚停策倚
茂松側逕旣窈窕環洲亦玲瓏俛視喬木杪仰
聆大壑淙石橫水分流林密蹊絕蹤解作竟何
感升長皆丰容初篁苞綠籜新蒲含紫茸海鷗
戲春岸天鷄弄和風撫化心無厭覽物眷彌重
不惜去人遠但恨莫與同孤遊非情歎賞廢理
誰通

從斤竹澗越嶺溪行

猿鳴誠知曙谷幽
光未顯巖下雲方合
花上露猶泫逶迤傷
隈隩迢遞陟陁峴過
澗旣厲急登棧亦陵
緬川渚屢逕復乘流
翫迴轉蘋萍泛沈
深菰蒲冒清淺企石
挹飛泉攀林摘葉卷
想見山阿人薜蘿若
在眼握蘭勤徒結折
麻心莫展情用賞爲
美事昧竟誰辨觀此
遺物慮一悟得所遣

廬陵王墓下作

曉月發雲陽落日次
朱方含悽泛廣川灑
淚眺

連岡眷言懷君子沉痛切中腸道消結憤懣運
開申悲涼神期恒若存德音初不忘徂謝易永
久松柏森已行延州協心許楚老惜蘭芳解劍
竟何及撫墳徒自傷平生疑若人通蔽互相妨
理感深情慟定非識所將脆促良可哀天枉特
兼常一隨往化滅安用空名揚舉聲泣已漉長
歎不成章

還舊園作見顏范二中書

辭滿豈多秩謝病不待年偶與張邴合久欲還

東山聖靈昔迴眷微尚不及宣何意衝飈激烈
火縱炎煙焚玉發崑峯餘燎遂見遷投沙理既
迫如邛願亦愆長與懽愛別永絕平生緣浮舟
千仞壑揔轡萬尋顛流沫不足險石林豈爲難
閩中安可處日夜念歸旋事蹟兩如直心慚三
避賢託身青雲上棲巖挹飛泉盛明盪氛昏貞
休康屯遭殊方感成貸微物豫采甄感深操不
固質弱易扳纏曾是反昔園語往實款然曩基
卽先築故池不更穿果木有舊行壤石無遠延

雖非休憩地聊取永日閒衛生自有經息陰謝
所牽夫子照情素探懷授往篇

入華子崗是麻源第三谷

南州實炎德桂樹陵寒山銅陵映碧澗石磴瀉
紅泉旣枉隱淪客亦棲肥遯賢險陁無測度天
路非術阡遂登羣峰首邀若升雲煙羽人絕髣
髴丹丘徒空筌圖牒復磨滅碑版誰聞傳莫辯
百世後安知千載前且申獨往意乘月弄潺湲
恒充俄頃用豈爲古今然

登臨海嶠初發疆中作與從弟惠連

杪秋尋遠山山遠行不近與子別山阿含酸赴
修畛中流袂就判欲去情不忍顧望脰未怕汀
曲舟已隱

隱汀絕望舟驚棹逐驚流欲抑一生歡并奔千
里遊日落當棲薄繫纜臨江樓豈惟夕情斂憶
爾共淹畱

淹畱管時歡復增今日歎茲情已分慮況迺協
悲端秋泉鳴北澗哀猿響南巒戚戚新別心悽

悽久念攢

攢念攻別心旦發清溪陰暝投剡中宿明登天
姥岑高高入雲霓還期邠可尋儻遇浮丘公長
絕子徽音

入彭蠡湖口

客遊勸水宿風潮難具論洲島驟迴合圻岸屢
崩奔乘月聽哀狔浥露馥芳蓀春晚綠塹秀巖
高白雲屯千念集日夜萬感盈朝昏攀崖照石
鏡牽葉入松門三江事多往九派理空存靈物

宏珍怪異人祕精魂金膏滅明允水碧綴流溫
徒作千里曲絃絕念彌散

酬從弟惠連

寢瘵謝人徒滅迹入雲峯巖壑寓耳目歡愛隔
音容永絕賞心望長懷莫與同末路值令弟開
顏披心胷

心胷旣云披意得咸在斯凌澗尋我室散帙問
所知夕慮曉月流朝忌曛日馳悟對無厭歇聚
散成分離

分離別西川迴景歸東山別時悲已甚別後情
更延傾想遲嘉音果枉濟江篇辛勤風波事款
曲洲渚言

洲渚旣淹時風波子行遲務協華京想詎存空
谷期猶復惠來章祇足攪余思儻若果歸言共
陶暮春時

暮春雖未交仲春善遊遨山樾發紅萼野蕨漸
紫苞嚶鳴已悅豫幽居猶鬱陶夢寐佇歸舟釋
我吝與勞

初去郡

彭薛裁知恥，貢公未遺榮。或可優貪競，豈足稱
達生。伊予秉微尚，拙訥謝浮名。廬園當棲巖，卑
位代躬耕。顧已雖自許，心迹猶未并。無庸妨周
任，有疾像長卿。畢娶類尚子，薄游似邴生。恭承
古人意，促裝返柴荆。牽絲及元興，解龜在景平。
負心二十載，於今廢將迎。理棹遙還期，遵渚驚
脩垵。溯溪終水涉，登嶺始山行。野曠沙岸淨，天
高秋月明。憩石挹飛泉，攀林蹇落英。戰勝懼者

肥鑑止流歸停卽是羲唐化獲我擊壤情

初發石首城

白珪尚可磨斯言易爲緇雖抱中孚爻猶勞貝
錦詩寸心若不亮微命察如絲日月垂光景成
貸遂兼茲出宿薄京畿晨裝搏曾颺重經平生
別再與芻知辭故山日已遠風波豈還時茗茗
萬里帆茫茫終何之遊當羅浮行息必廬霍期
鉞海陵三山遊湘歷九疑欽聖若旦暮懷賢亦
悽其皦皦明發心不爲歲寒欺

道路憶山中

采菱調易急江南歌不緩楚人心昔絕越客腸
今斷斷絕雖殊念俱爲歸慮款存鄉爾思積憶
山我憤懣追尋栖息時偃卧任縱誕得性非外
求自己爲誰暮不怨秋夕長常苦夏日短濯流
激浮湍息陰倚密竿懷故叵新歡含悲忘春暝
悽悽明月吹惻惻廣陵散殷勤訴危柱慷慨命
促管

南樓中望所遲客

杳杳日西頽漫漫長路迫登樓爲誰思臨江遲
來客與我別所期期在三五夕圓景早已滿佳
人猶未適卽事怨睽攜感物方悽戚孟夏非長
夜晦明如歲隔瑤華不堪折蘭茝已屢擿路阻
莫贈問云何慰離析搔首訪行人引領冀良覲

田南樹園激涼植援

樵隱俱在山由來事不同不同非一事養病丘
園中中園屏氛雜清曠招遠風卜室倚北阜啟
扉面南江激澗代汲井插槿當列墉羣木旣羅

戶衆山亦當牕靡迤邐下田迢遞瞰高峯寡欲
不期勞卽事罕人功唯開蔣生徑永懷求羊蹤
賞心不可忘妙善冀能同

齋中讀書

昔余遊京華未嘗廢丘壑矧乃歸山川心跡雙
寂漠虛館絕諍訟空庭來鳥雀臥病豐暇豫翰
墨時間作懷抱觀古今寢食展戲謔旣笑沮溺
苦又哂子雲閣執戟亦以疲畊稼豈云樂萬事
難竝歡達生幸可託

石門新營所住四面高山迴溪石瀨茂林

脩竹

躋險築幽居披雲臥石門苔滑誰能步葛弱豈
可捫嫋嫋秋風過萋萋春草繁美人遊不還佳
期何由啟芳塵凝瑤席清醕滿金罇洞庭空波
瀾桂枝徒攀翻結念屬霄漢孤景莫與援俯濯
石下潭仰看條上猿早聞夕飈急晚見朝日噉
崕傾光難留林深響易奔感往慮有復理來情
無存庶持乘日車得以慰營魂匪爲衆人說冀

與智者論

命學士講書

臥病同淮陽宰邑曠武城弦歌媿言子清淨謝
伏生古人不可攀何以報恩榮時往歲易周聿
來政無成曾是展予心招學講羣經鑠金旣云
刃凝土亦能鋤望爾志尚隆遠嗣竹箭聲敢謂
荀氏訓且布蘭陵情待罪豈久期禮樂俟賢明
擬魏太子鄴中集詩

魏太子

建安末余時在鄴宮朝遊夕讌究歡愉之極
天下良辰美景賞心樂事四者難并今昆弟
友朋二三諸彥共盡之矣古來此娛書籍未
見何者楚襄王時有宋玉唐景梁孝王時有
鄒枚嚴馬遊者美矣而其主不文漢武帝徐
樂諸才備應對之能而雄猜多忌豈獲晤言
之適不誣方將庶必賢於今日爾歲月如流
零落將盡撰文懷人感往增愴其辭曰

百川赴巨海衆星環北辰照灼爛霄漢遙裔起

長津天地中橫濱家王拯生民區宇旣滌蕩群
英必來臻忝此欽賢性由來常懷仁况值衆君
子傾心隆日新論物靡浮說析理實敷陳羅縷
豈闕辭窈窕究天人澄觴滿金罍連榻設華茵
急絃動飛聽清歌拂梁塵何言相遇易此歡信
可珍

王粲

家本秦川賈公子孫遭亂流寓自傷情多

幽厲昔歾亂相靈今板蕩伊洛旣燎煙函崦沒

無像整裝辭秦川秣馬赴楚壤沮漳自可美客
心非外獎常歎詩人言式微何由往上宰奉皇
靈侯伯咸宗長雲騎亂漢南宛郢皆埽盪排霧
屬盛明披雲對清朗慶泰欲重疊公子特先賞
不謂息肩願一旦值明兩竝載遊鄴京方舟汎
河廣綢繆清讌娛寂寥梁棟響旣作長夜飲豈
顧乘日養

陳琳

袁本初書記之士故述喪亂事多

皇漢逢迤邐天下遭氛慝董氏淪關西袁家擁
河北單民易周章窘身就羈勒豈意事乖已永
懷戀故園相公實勤王信能定螽賊復覩東都
輝重見漢朝則餘生幸已多矧迺值明德愛客
不告疲飲讌遺景刻夜聽極星爛朝遊窮曠黑
哀哇動梁埃急觴盪幽默且盡一日娛莫知古
來惑

徐幹

少無宦情有箕潁之心事故仕世多素辭

伊昔家臨淄提攜弄齊瑟置酒飲膠東淹留憩
高密此歡謂可終外物始難畢搖蕩箕濮情窮
年迫憂慄末塗幸休明棲集建薄質已免負薪
苦仍游椒蘭室清論事究萬美話信非一行觴
奏悲歌永夜繫白日華屋非蓬屋時髦豈余匹
中飲顧昔心悵焉若有失

劉楨

卓犖偏人而文最有氣所得頗經奇

貧居晏里閑少小長東平河充當衝輿淪飄薄

許京廣川無逆流招納厠羣英北度勅陽津南
登紀郢城旣覽古今事頗識治亂情歡爰相解
達敷奏究平生矧荷明哲顧知深覺命輕朝遊
牛羊下暮坐括搗鳴終歲非一日傳卮弄新聲
辰事旣難諧懽願如今并唯羨肅肅翰續紛戾
高冥

應瑒

汝潁之士流離在故頗有飄薄之嘆

嗷嗷雲中雁舉翮自委羽求涼弱水湄違寒表

沙渚顧我梁川時緩步集潁許一旦逢世難淪
薄恒羈旅天下昔未定託身早得所官渡厠一
卒烏林顓難阻晚節值衆賢會同庇天宇別坐
蔭華棖金罇盈清醕始奏延露曲繼以闌夕語
調笑輒翦荅嘲謔無慙沮傾軀無遺慮在心良
已敘

阮瑀

管書記之任故有優渥之言

河洲多沙塵風悲黃雲起金羈相馳逐聯翩何

窮已慶雲惠優渥微薄攀多士念管渤海時南
皮戲清沚今復河曲遊鳴篴汎蘭汜躡步陵丹
梯竝坐侍君子妍譚旣愉心哀弄一作音信睦耳
傾醑係芳醕酌言豈終始自從食萍來唯見今
日美

平原侯植

公子不及世事但美遨遊然頗有憂生之嗟
朝遊登鳳閣日暮集華沼傾柯引弱枝攀條摘
蕙草徒倚窮騁望目極盡所討西顧太行山北

眄邯鄲道平衢脩且直白楊信裊裊副君命飲
宴歡娛寫懷抱良遊匪晝夜豈云晚與早衆賓
悉精妙清辭灑蘭藻哀音下迴鵠餘哇徹清昊
中山不知醉飲惠方覺飽願以黃髮期養生念
將老

白石巖下徑行田

小邑居易貧災年民無生知淺憇不周憂
在情莓薺橫海外蕪穢積頽齡饑饉不可久甘
心務經營千頃帶遠堤萬里瀉長汀州流涓澮

合連統塍埒并雖非楚宮化荒闕亦勑萌雖非
鄭白渠每歲望東京天鑒儻不孤來茲驗微誠

過瞿溪山飯僧

迎旭凌絕嶮暎沄歸漱浦鑽燧斷山木拚岸墻
石戶結架非丹甍籍田資宿莽同游息心客曉
熒若可睹清霄颺浮煙空林響灋鼓忘懷狎鷗
鯢攝生馴兕虎望嶺眷靈鷲延心念淨土若乘
四等觀永拔三界苦

歲暮

殷憂不能寐苦此夜難積明月照積雪朔風勁
且哀運往無淹物年逝覺易催

彭城宮中直感歲暮

草草眷物徂契契矜歲殫楚豔起行戚吳趨絕
歸懽修帶緩舊裳素鬢改朱顏晚暮悲獨坐鳴
鵲歇萼蘭

詠冬

七宿乘運曜三星與時滅履霜冰彌堅積寒風
愈切繁雲起重陰迴飈流輕雪園林粲斐皓庭

除秀皎潔墀瑣有凝汗達衢無通轍

三月三日侍宴西池

四言

詳觀記牒鴻荒莫傳降及雲鳥曰聖剗天虞承
唐命周襲商艱江之永矣皇心惟眷矧迺暮春
時物芳衍濫觴逶迤周流蘭殿禮備朝容樂闋
夕宴

七夕詠牛女

火逝首秋節明經弦月夕月弦光照戶牀首風
入隙陵風步曾岑憑雲肆遙脈徙倚西北庭竦

踴東南覲紈綺無報章河漢有駁軌

登廬山絕頂望諸嶠

積峽忽復啓平塗俄已閉巒隴有合沓往來無
蹤轍晝夜蔽日月冬夏共霜雪

石門巖上宿

詩紀作夜宿石門

朝搴苑中蘭畏彼霜下歇暝還雲際宿弄此石
上月鳥鳴識夜棲木落知桐發異音同致聽殊
響俱清越妙物莫爲賞芳醕誰與伐美人竟不
來陽阿徒晞髮

入東道路

整駕辭金門命旅惟詰朝懷居顧歸雲指塗沂
行颺屬值清明節榮華感和韶陵隰繁綠杞墟
囿粲紅桃嚶嚶羣方雒纖纖麥垂苗隱軫邑里
密緬邈江海遼滿目皆古事心賞賢所高魯連
謝千金延州權去朝行路旣經見願言寄吟謠

夜發石關亭

隨山踰千里浮溪將十夕鳥歸息舟楫星闌命
行役亭亭曉月映泠泠朝露滴

初發入南城

弄波不輟手玩景豈停目雖未登雲峯且以歡
水宿

郡東山望溟海

開春獻初歲白日出悠悠蕩志將愉樂瞰海庶
忘憂策馬步蘭臯控縹息椒丘採蕙遵大薄蹇
若履長洲白華綰陽林紫薌曄春流非徒不弭
忘覽物情彌適護蘇始无畏寂寞終可求

初往新安至桐廬口

絺綌雖淒其授衣尚未至感節良已深懷古徒
役思不有千里棹孰申百代意遠協尚予心遙
得許生計旣及冷風善又卽秋水駛江山共閒
曠雲日相照媚景夕羣物清對玩咸可喜

離合詩

古人怨信次十日眇未央加我懷繾綣口詠情
亦傷劇哉歸遊客處子勿相忘

石壁立招提精舍

四城有頓躋三壑無極已浮歡昧眼前沈照貫

終始壯齡緩前期頽季迫暮齒揮霍夢幻頃飄
忽風電起良緣迨未謝昔逝不可俟敬擬靈鷲
山尚想祇洹軌絕潛飛庭前高林映牕裏禪室
栖空觀講宇析妙理

種桑

訕人陳條柯亦有美攘剔前修爲誰故後事資
紡績常佩智方誠媿微富教益浮陽驚嘉月藝
桑迨閒隙疎欄發近郭長行達廣場曠流始茲
泉酒塗猶跬跡俾此將長成慰我海外役

淨土詠

法藏長王宮懷道出國城願言四十八弘誓拯
羣生淨土一何妙來者皆菁英願言安可寄乘
化必晨征

登永嘉綠嶂山

裹糧杖輕屐懷遲上幽室行源徑轉遠距陸情
未畢澹漱結寒姿團欒潤霜質澗委水屢迷林
迴巖逾密眷西謂初月顧東疑落日殘夕奄昏
曙蔽翳皆周悉壘上界不事履二美貞吉幽人

常坦步高尚邈難匹顧阿竟何端寂寂寄抱一
恬如既已交繕性自此出

遊嶺門山

西京誰修政龔汲稱良吏君子豈定所清塵慮
不嗣早莅建德鄉民懷虞芮意海岸常寥寥空
館盈清思協以上冬月晨遊肆所喜千圻邈不
同萬嶺狀皆異威摧三山峭澌汨兩江駛渙舟
豈安流樵拾謝西芑人生誰云樂貴不屈所志

石室山

清旦索幽異放舟越垌郊
莓莓蘭渚急蘋蘋苔
頰高石室冠林陬飛泉發山椒
虛泛徑千載崢嶸非一朝
鄉邨絕聞見樵蕨限風霄
微戎無遠覽總筭羨升喬
靈域久韜隱如與心賞交
合歡不容言摘芳弄寒條

登上戍石鼓山

旅人心長久憂憂自相接
故鄉路遙遠川陸不可涉
汨汨莫與娛發春托登躡
歡願旣無竝戚慮庶有協
極目睎左闕迴顧眊右狹
日沒澗增

波雲生嶺逾疊白芷競新茗綠蘋齊初葉摘芳
靡緩愉樂樂不變佳期緬無像騁望誰云愜
發歸瀨三瀑布望兩溪

我行乘日垂放舟候月圓沫江免風濤涉清弄
猗連積石竦兩溪飛泉倒三山亦旣窮登陟荒
藹橫目前窺巖不覩景披林豈見天陽烏尚傾
翰幽篁未爲遘退尋平常時安知巢穴難風雨
非攸恡擁志誰與宣倘有同枝條此日卽千年
過白岸亭

拂衣遵沙垣緩步入蓬屋近澗涓密石遠山暎
疎木空翠難強名漁釣易爲曲援蘿聆青崖春
心自相屬交交止栩黃呦呦食萍鹿傷彼人百
哀嘉爾承筐樂榮悴迭去來窮通成休感未若
長疎散萬事恒抱朴

行田登海口盤嶼山

羈苦孰云慰觀海藉朝風莫辨洪波極誰知大
壑東依稀採菱歌彷彿含嚔容遨遊碧沙渚遊
衍丹山峯

荅謝惠連

懷人行千里我勞盈十旬別時花灼灼別後葉
蓁蓁

東陽溪中贈荅

可憐誰家婦緣流洒

古洗字

素足明月在雲間迢

迢不可得可憐誰家郎緣流乘素舸但問情若
何月就雲中墮

臨川被收

韓亾子房奮秦帝魯連恥本自江海人忠義感

君子

臨終詩

龔勝無遺生季業有窮盡
嵇叟理既迫霍子命亦殞
悽悽陵霜柏網網衝風菌
邂逅竟無時修短非所愍
恨我君子志不得巖上泯
送心正覺前斯痛久已忍
唯願乘來生怨親同心朕

大林峯

見天池集

積峽忽有起平途俄已絕
巒龍有合沓往來無蹤轍

謝康樂集卷之三

謝康樂集卷之四

表

謝封康樂侯表

昔強氏暴虐恃僭曆紀旣噬五都志吞六合遂
陷沒西河傾覆南瀟凌藉紀郢跨越淮泗于時
策盡惟疑地險已謝咸思君臣同泯有生無餘
亡祖奉國威靈董符戎重盡心所事剋黜禍亂
功參盤鼎胙土南服逮至臣身值遭泰路日月
改暉榮落代運輸稅唐化生幸無已不悟天道

下濟鴻均曲成廼眷遐績式是興分虎鈿龜
復顯茅土鳴玉拖綬班景元勛澤洽往德恩覃
來胤永惟先蹤遠感芻結豈臣阨弱所當忝承
臣聞至公無私甄善則一皇恩遠被殊代可侔
是以信陵之賢簡在高祖之心望諸之道復獲
隆漢之封觀史歎古欽茲盛美豈謂榮渥近霑
微躬傾宗殞元心識其會酌恩荅厚罔知所由
詣闕上表

臣自抱疾歸山于今三載居非郊部事乖人間

幽棲窮巖外緣兩絕守分養命庶畢餘年忽以
去月二十八日得會稽太守臣顗二十七日疏
云比日異論囀咭此雖相了百姓不許寂默今
微爲其防披疏駭惋不解所由便星言奔馳歸
骨陛下及經山陰防衛彰赫彭排馬槍斷截衢
巷偵邏縱橫戈甲竟道不知微臣罪爲何事及
見顗雖曰見亮而裝防如此唯有罔懼臣昔忝
近侍豫蒙天恩若其罪迹炳明文字有證非但
顯戮司敗以正國典普天之下自無容身之地

今虛聲爲罪何酷如之夫自古讒謫聖賢不免
然致謫之來要有由趣或輕死重氣結黨聚羣
或勇冠鄉邦劒客馳逐未聞俎豆之學欲爲逆
節之皐山棲之士而構陵上之譽今影迹無端
假謫空設終古之酷未之或有匪忝其生實悲
其痛誠復內省不疚而抱理莫申是以牽曳疾
病束骸歸欵仰憑陛下天鑒曲臨則歿之日猶
生之年也臣憂怖彌日羸疾發動尸存恍惚不
知所陳

論

辨宗論

同遊諸道人竝業心神道求解言外余枕疾務寡頗多暇日聊伸由來之意庶定求宗之悟釋氏之論聖道雖遠積學能至累盡鑒生不應漸悟孔氏之論聖道旣妙雖顏殆庶體無鑒周理歸一極有新論道士以爲窳鑒微妙不容階級積學無限何爲自絕今去釋氏之漸悟而取其能至去孔氏之殆庶而取其一極一極異漸悟

能至非殆庶故理之所去雖合各取然其離孔
釋矣余謂二談救物之言道家之唱得意之說
敢以折中自許竊謂新論爲然聊荅下意遲有
所悟

法最問敬覽清論明宗極雖微而一悟頓了雖
欣新剖竊有所疑夫明達者以體理絕欲悠悠
者以迷惑嬰累絕欲本乎見理嬰累由於乖宗
何以言之經云新學者離般若便如失明者無
導是爲懷理蕩患於茲顯矣若涉求未漸於大

宗希仰猶累於塵垢則求劫勦勞期果緬邈既
懷猶豫伏遲嘉訓初荅道與俗反理不相關故
因權以通之權雖是假旨在非假智雖是真能
爲非真非真不傷真本在於濟物非假不遂假
濟物則反本如此之劫無爲空勤期果有如皎
日

勗再問案論孔釋其道旣同救物之假亦不容
異而神道之域雖顏也孔子所不晦實相之妙
雖愚也釋氏所必教然則二聖建言何乖背之

甚哉再荅二教不同者隨方應物所化地異也
大而校之華民易於見理難於受教故閉其累
學而開其一極夷人易於受教難於見理故閉
其頓了而開其漸悟漸悟雖可至昧頓了之實
一極雖知寄絕累學之冀良由華人悟理無漸
而誣道無學夷人悟理有學而誣道有漸是故
權實雖同其用各異昔向子期以儒道爲壹應
吉甫謂孔老可齊皆欲窺宗而况真實者乎
曷三問重尋荅以華夷有險易之性故二聖敷

異同之教重方附俗可謂美矣然淵極朗鑒作
則於上愚民蒙昧伏從於下故作則宜審其政
伏從必是其宗令孔廢聖學之路而釋開漸悟
之逕筌蹄既已紛錯群黎何由歸真三荅冬夏
異性資春秋爲始末晝夜殊用緣辰暮以往復
况至精之理豈可逕接至粗之人是故傍漸悟
者所以密造頓解倚孔教者所以潛成學聖學
聖不出六經六經而得頓解不見三藏而以三
藏果筌蹄歷然何疑紛錯魚兔既獲群黎濟

僧維問承新論法師以宗極微妙不容階級使
夫學者窮有之極自然之無有若符契何須言
無也若資無以盡有者焉得不謂之漸悟耶初
答夫累既未盡無不可得盡累之弊始可得無
耳累盡則無誠如符契將除其累要須傍教在
有之時學而非悟悟在有表託學以至但階級
教愚之談一悟得意之論矣

維再問論云悟在有表得不以漸俟夫涉學希
宗當日進其明不若使明不日進與不言同若

日進其明者得非漸悟乎再荅夫明非漸至信
由教發何以言之由教而信則有日進之功非
漸所明則無入照之分然向道善心起損累出
垢伏伏似無同善似惡乖此所務不俱非心本
無累至夫一悟萬滯同盡耳

維三問荅云由教而信則有日進之功非漸所
明則無入照之分夫尊教而推宗者雖不求用
當推之時豈可不慙令無耶若許其慙合猶自
賢於不合非漸如何三荅慙者假也真者常也

假知無常常知無假今豈可以假知之慙而侵
常知之真哉今整合賢於不合誠如來言竊有
微證巫臣諫莊王之言物賒於已故理爲情先
及納夏姬之時已交於物故情居理上情理雲
互物已相傾亦中智之率任也若以諫日爲悟
豈容納時之惑耶且南爲聖也北爲愚也背北
向南非停北之謂向南背北非至南之稱然向
南可以至南背北非是停北非是停北故愚可
去矣可以至南故悟可得矣

慧麟演僧維問當假知之壹合與真知同異初
荅與真知異

麟再問以何爲異再荅假知者累伏故理暫爲
用用暫在理不恒其知真知者照寂故理常爲
用用常在理故永爲真知

麟三問累不自除故求理以除累今假知之一
合理實在心在心而累不去將何以去之乎三
荅累起因心心觸成累累恒觸者心日昏教爲
用者心日伏伏累彌久至於滅累然滅之豈在

累伏之後也伏累滅累貌同實異不可不察滅
累之體物我同忘有無壹觀伏累之狀他已異
情空實殊見殊實空異已他者入於滯矣壹無
有同我物者出於照也

麟維問三世長於百年三千廣於赤縣四部多
於戶口七寶妙於石沙此亦方有小大故化有
遠近得不謂之然乎初荅事理不同恒成四端
自有小大各得其宜亦有賢愚違方而處所謂
世同時異物是人非譬割鷄之政亦有牛刀佩

璽而聽豈皆唐虞今謂言游體盡於武城長世
皆覃於天下未之聞也且俱稱妙覺而國土精
粗不可以精粗國土而言聖有優劣景迹之應
本非所徵矣

維再問論云或道廣而事狹或事是而人非今
不可以事之大小而格道之粗妙誠哉斯言但
所疑不在此耳設令周孔實未盡極以之應世
故自居宗此自是亶去聖遠未足明極夫降妙
數階以接群粗則粗者所不惻然數階之妙非

極妙之謂推此而言撫世者於粗爲妙然於妙
猶粗矣以妙求粗則無往不盡以粗求妙則莫
覩其源無往不盡故謂之窮理莫覩其源故仰
之彌高今豈可就顏氏所崇而同之極妙耶再
荅今不藉顏所推而謂之爲極但謂顏爲度幾
則孔知機矣且許禹昌言孔非本談以堯則天
體無是同同體至極豈計有之小大耶

維三問凡世人所不測而又昌言者皆可以爲
聖耶三荅夫昌言賢者尚許其賢昌言聖者豈

得反非聖耶日用不知百姓之迷蒙唯佛究盡
實相之崇高今欲以崇高之相而令迷蒙所知
未之有也苟所不知焉得不以昌言爲信旣以
釋昌爲是何以孔昌爲非耶

竺法綱問敬披高論探研宗極妙判權實存旨
儒道遺教孔釋昌言折中允然新論可謂激流
導源瑩拂發暉矣詳復荅勗維之問或謂因權
以通或學而非悟爾爲玄句徒設無關於胷情
焉竊所未安何以言之夫道形天隔幾二險絕

學不漸宗曾無髣髴馳騁有端思不出位神崖
易由而登機鋒何從而超哉若勤務於有而坐
體於無者譬猶揮毫鍾張之則功侔羿養之能
不然明矣蓋同有非甚礙尚不可以翫此而善
彼豈况乎有無之至背而反得以相通者耶又
云累既未盡無不可得盡累之弊始可得無耳
問曰夫膏肓大道摧輶玄路莫尚於封有之累
也蓋有不能祛有祛有者必無未有先盡有累
然後得無也就如所言累盡則無爾爲累之自

去實不無待實不無待則不能不無故無無覺
矣如彼重闇自晞無假火日無假火日則不能
不設亦明無尚焉落等級而奇頓悟將於是乎
躋矣假任之餘幸思嘉釋

釋慧琳問三復精議辨愷二家斟酌儒道實有
懷於論矣至於去釋漸悟遺孔殆庶蒙竊惑焉
釋云有漸故是自形者有漸孔之無漸亦是自
道者無漸何以知其然耶中人可以語上久習
可以移性孔氏之訓也一合於道場非十地之

所階釋家之唱也如此漸絕文論二聖詳言豈獨夷束於教華拘於理將恐斥離之辨辭長於新論乎

勗道人難云絕欲由於體理當謂日損者以理自悟也論曰道與俗反本不相關故因權以通之物濟則反本

問曰權之所假習心者亦終以爲慮乎爲曉悟之日與經之空理都自反耶若具未背空談翻爲未說若始終相扶可循教而至下荅維麟假

知中殊爲藻艷但與立論有違假者以旋迷喪
理不以鑽火致惑苟南向可以造越北背可以
棄燕信燕北越南矣慮空可以洗心捐有可以
祛累亦有愚而空聖矣如此但當勤般若以日
忘瞻郢路而驟進復何憂於失所乎將恐一悟
之唱更躋於南北之譬耶

荅綱琳二法師

披覽雙難欣若暫對藻豐論博蔚然滿目可謂
勝人之口然未厭於心聊伸前意無由言對執

筆長懷謝靈運和南

荅綱公難

來難云同有非甚閱尚不可以翫此而善彼豈
况乎有無之至背而反得以相通者耶此是拘
於所習以生此疑耳夫專翫筆札者自可不工
於弧矢弧矢旣工復翫筆札者何爲不兼哉若
封有而不向宗自是封者之失造無而去滯何
爲不可得背借不兼之有以詰能兼之無非惟
鍾胡愧射於更李羿養暫書於羅趙觸類之蹟

始充巧歷之歎今請循其本夫憑無以伏有伏
久則有怠伏時不能知知則不復辨是以坐怠
日損之談近出老莊數緣而滅經有舊說如此
豈累之自去實無之所濟且明爲晦新功在火
日但火日不稱功於幽闇般若不言惠於愚蠢
耳推此而往詎俟多云

荅琳公難

孔雖曰語上而云聖無階級釋雖曰一合而云
物有佛性物有佛性其道有歸所擬者漸教聖

無階級其理可貴所疑者殆庶豈二聖異塗將地使之然斥離之歎始是有在舜長之論無乃角弓耶

難云若其求背空談翻與未說若始終相扶可循教而至可謂公孫之辭辯者之囿矣夫智爲權本權爲智用今取聖之意則智卽經之辭則權傍權以爲檢故三乘咸蹄筌旣意以歸宗故般若爲魚兔良由民多愚也教故遷矣若人皆得意亦何貴於攝悟假知之論旨明在有者能

爲達理之諫是爲交賒相傾非悟道之謂與其
立論有何相違燕北越南有愚空聖其理旣當
頗獲於心矣若勤者日忘瞻者驟進亦實如來
言但勤未是得瞻未是至當其此時可謂向宗
旣得旣至可謂一悟將無同轡來馳而云異轍
耶

王衛軍問

論曰由教而信有日進之功非漸所明無入
照之分問曰由教而信而無入照之分則是

闇信聖人若闇信聖人理不關心政可無非
聖之尤何由有日進之功

論曰暫者假也真者常也假知無常常知無
假又曰假知累伏理暫爲用用暫在理不恒
其知問曰暫知爲假知者則非不知矣但見
理尚淺未能常用耳雖不得與真知等照然
寧無入照之分耶若暫知未是見理豈得云
理暫爲用者又不知以何稱知

論曰教爲用者心日伏伏累彌久至於滅累

問曰教爲用而累伏爲云何伏耶若都未見
理專心闇信當其專心唯信而已謂此爲累
伏者此是慮不能並屬此則彼廢耳非爲理
累相推能使累伏也凡厥心數孰不皆然如
此之伏根本未異一倚一伏循環無已雖復
彌久累何由滅

一悟之談常謂有心但未有以折中異同之
辨故難於厝言耳尋覽來論所釋良多然猶
有未好解處試條如上爲時可容此疑不旣

欲使彼我意盡覽者冷然後對無兆兼當造
膝執筆增懷真不可言王弘敬謂

荅王衛軍問

問由教而信

云

荅曰顏子體二未及於照則

向善已上莫非闇信但教有可由之理我有求
理之志故曰關心賜以之二回以之十豈直免
尤而已實有日進之功

問暫知

云

荅曰不知而稱知者正以假知得

名耳假者爲名非暫知如何不恆其用豈常之

謂旣非常用所以交賒相傾故諫人則言政理
悅已則犯所知若以諫時爲照豈有悅時之犯
故知言理者浮談犯知者沉惑推此而判自聖
已下無淺深之照然中人之性有崇替之心矣

問教爲用而累伏

云

答曰累伏者屬此則廢

彼實如來教凡厥心數孰不皆然亦如來旨更
恨不就學人設言而以恒物爲譏耳譬如藥驗
者疾易痊理妙者吝可洗洗吝豈復循環疾痊
安能起滅則事不侔居然已辨但無漏之功故

資世俗之善善心雖在五品之數能出三界之外矣平叔所謂冬日之陰輔嗣亦云遠不必携聊借此語以況入無果無阻隔

靈運白一悟理質以經誥可謂俗文之談然書不盡意亦前世格言幽僻無事聊與同行道人共求其衷猥辱高難詞微理析莫不精究尋覽彌日欣若暫對輒復更伸前論雖不辨酬釋來問且以示懷耳海嶠岨迴披叙無期臨白增懷眷歎良深謝靈運再拜

書

勸伐河北書

自中原喪亂百有餘年流離寇戎湮沒殊類先
帝聰明神武哀濟羣生將欲盪定趙魏大同文
軌使久凋反於正化偏俗歸於華風運謝事乖
理違願絕仰德抱悲恨存生盡况陵塋未幾凶
虜伺隙預在有識誰不憤歎而景平執事竝非
其才且邁紛京師豈慮託付遂使孤城窮陷莫
肯拯忠烈囚朔漠縣河三千翻爲寇有晚遣鎮

戎皆先朝之所開拓一旦淪亡此國恥宜雪被
於近事者也又北境自染逆虜窮苦備罹徵調
賦斂靡有止已所求不獲輒致誅殞身禍家破
闔門比屋此亦仁者所謂傷心者也咸云西虜
舍末遠師隴外東虜乘虛呼可掩襲西軍旣反
得據關中長圍咸陽還路已絕雖遣救援停住
河東遂乃遠討天城欲爲首尾而西寇溪山重
阻根本自固徒棄巢窟未足相拯師老於外國
虛於內時來之會莫復過此觀兵耀威實在茲

日若相持未已或生事變忽值新起之衆則異
於今苟乖其時難爲經略雖兵食倍多則萬全
無必矣又歷觀前代類以兼弱爲本古今聖惠
未之或殊豈不以天時人事理數相得興亡之
度定期居歟故古人云旣見天殃又見人災乃
可以謀晉魏氏之疆平定荆冀乃乘袁劉之弱
晉氏之盛拓開吳蜀亦因葛陸之衰此皆前世
成事箸於史策者也自羌平之後天下亦謂虜
當俱滅長驅滑臺席卷下城奪氣喪魄指日就

盡但長安違律潼關失守用緩天誅假延歲月
日來至今十有二載是謂一紀曩有前言況五
胡代數齊世虜期餘命盡於來年自相攻代兩
取其困卞莊之形驗之今役仰望聖澤有若飢
渴注心南雲爲日已久來蘇之冀實歸聖明此
而弗乘後則未兆即日府藏誠無兼儲然凡造
大事待國富兵彊不必乘會於我爲易責在得
時器械旣充衆力粗足方於前後乃當有優常
議損益久證冀州口數百萬有餘田賦之沃著

自貢典先才經創基趾猶存澄流引源桑麻蔽
野疆富之實昭然可知爲國長久之計孰若一
往之費邪或懲關西之敗而謂河北難守二境
形勢表裏不同關西雜居種類不一皆在前漢
屯軍霸上通火甘泉況乃遠戍之軍值新故交
代之際者乎河北悉是舊戶差無雜人連額判
阻三關作隘若遊騎長驅則沙漠風靡若嚴兵
守塞則冀方山固晉隴西傷破鼃錯興言匈奴
慢侮賈誼憤歎方於今日皆爲賒矣晉武中主

耳值孫皓虐亂天祚其德亦由鉅平奉策荀賈
折謀故能業崇當年區于一統況今陛下聰明
聖哲天下歸仁文德與武功竝震霜威共素風
俱舉協以宰輔賢明諸王美令岳牧宣烈虎臣
盈朝而天威遠命亦何敵不滅矧伊頑虜假日
而已哉伏惟深機志務久定神謨臣卑賤側陋
竄景巖穴實仰希太平之道傾覩岱宗之封雖
乏相如之筆庶免史談之憤以此謝病京師萬
無恨矣久欲上陳懼在觸置蒙賜恩假暫違禁

省消渴十年常慮朝露抱此愚志昧死以聞

荅范特進二首

辱告慰企晚寒體中勝常靈運脚諸疾此春更甚憂慮故人有情信如來告企詠之結實過飢渴山澗幽阻音塵闊絕忽見諸讚歎慰良多可謂俗外之詠尋覽三復味翫增懷輒奉和如別雖詞不足睹然意寄盡此從弟惠連後進文悟衰宗之美亦有一首并以遠呈

又

承祗洹法業日茂隨喜何極六梁徽緣竊望不
絕即時經始招提在所住山南南檐臨澗北戶
背巖以此息心當無所忝邪平生緬然臨紙累
歎敬惜爲先繼以音告倘值行李輒復承問三
月一日謝靈運白

荅綱琳二法師

披覽隻難欣若暫對藻豐論博蔚然滿目可謂
勝人之口然未厭於心聊伸前意無由言對執
筆長懷